


寶積三昧經
入法界體性經

百六十
傷七

48385



元祿九年丙子二月日重修

皇圖鞏固 帝階綴昌

佛日增輝 懋輪常轉

山城州天安寺法金剛院置



二經同卷三

傷

佛說寶積三昧文殊師利菩薩問

法身經

入法界體性經

佛說寶積三昧文殊師利菩薩問法身經

後漢安息三藏法師安世高譯

聞如是一時佛至羅閱祇耆闍崛山

與千

二百五十比丘俱文殊菩薩往到佛所在門

外住所所以者何佛坐三昧未久佛覺見文殊

便請入作禮而住佛言且坐文殊問佛屬坐

三昧名曰何等佛言寶積文殊復問何故名

寶積佛言譬如摩尼珠本自淨好復以水洗

置其平地轉更明徹無不見者屬所入三昧
見東方無央數阿僧祇刹土及佛以復悉不
現住是三昧中無不見諸法本際其有信者
以爲得印所語如言摩尼寶舍有四角從一
角視悉見諸角無所缺減是故見諸本際
佛問文殊知本際不則言知何所是報言我
所處是爲本際諸所欲人異際在是際者亦
不在法亦不在善惡諸法亦如是其知是者
審以知之凡之知者以無所知從本傳習莫
有作者是故無有底佛問文殊何謂是慧審
是慧者是故慧復問何所道念名曰道報言
所念道無念是故道佛語文殊以有念言無

念當以何法教新學若男子女人文殊言亦
無所出亦無解婬怒癡無有極以是法教一
切以故無有根是故不可出不可解其言我
能壞本際以不能其言我能斷生是亦不能
不捨俗事不念近道作是者乃可教於凡人
文殊問佛持何法教學佛言我所教不壞色
痛癢思想生死識無所壞亦不教壞婬怒癡
令得不可計數法以是法教作佛道者我用
是故自致得佛佛語文殊無所壞法故致佛
無所得法能成佛佛者則法身諸種力無所
畏悉法身之所入所以者何莫能分一身者
而爲法身法身無所有數何以故不言是凡

人是不凡人法身等無差特無所散身是爲
法身譬如四瀆悉歸於海合爲一味若干名
法爲一法身諸所有種各各有名合會聚之
名曰穀若俗事道事悉合爲一法身所以者
何不可指示是爲俗事道事亦不可說是俗
事身是爲法身亦不可見視如我所說法身
其有信二知者所作衆惡悉以除盡文殊言
於法身亦不見生天上亦不見在人間亦不
見在三道亦不在泥洹佛語文殊今若所說
乃尔若有人問汝者佛現說有五道當何以
解之文殊言譬如人卧中見入泥黎若作
禽獸薜荔上在天上若在人中覺則無所見

其法身無所著所以者何但有數故數者墮俗
若羅漢辟支佛上至佛俱等一法身所以者
何不可分別故譬如若干種寶可別知法身
而不別所以者何不可別故無生無死故法
身無所生無所滅所以者何常住故亦無有
垢亦無有淨所以者何無有過者亦無勝亦
無所脫佛者無所不知復問文殊知法身不
文殊言若得者可知佛問文殊乃知世間所
在處不則言知佛言何所是文殊言其他人
處世在是世間者但有名求如毛際而無爲
我說者其世亦不離法身佛復問世所在何
所文殊言譬如雲所在無所在亦不羸亦不

強是則世世之相佛問文殊汝謂我滅不文
殊言不何以故法身無有生若有生乃有滅
法身者不生故知佛而不滅佛問文殊若聞
已過去恒邊沙佛悉般泥洹汝信不則言信
佛言云何信文殊言其佛者悉佛所化化般
泥洹故而信之佛問文殊汝見人臨死時知
所趣向則答言而人不可知何況所趣向佛
語文殊乃可聚會說法文殊言誰欲聽佛言
欲聽聚會者文殊白佛當因何法有所說佛
言說法身則言不見法身當何以說之佛語
文殊若所說法身不可見其在會中未曉者
聞其所言其心恐懼文殊言若恐懼其本際

已恐懼佛言本際無恐懼未曉者亦不恐懼
文殊言諸法無有恐懼者若金剛佛問何謂
金剛答言無能截斷者以故名曰金剛佛不
可議諸法亦不可議以是爲金剛佛言何所
爲金剛者文殊言勝諸法故佛者法法之審
故是爲金剛佛以何因爲金剛則答言所有
無所有一一求之無所有故曰空空者是佛
以是爲金剛一切諸法皆佛依無所依是故
金剛何緣是爲金剛則言無所依者無所近
是故爲金剛佛語文殊今我欲作感應今阿
難來所以者何爲一切受法故文殊問佛屬
所說法無所見無所得阿難來者當取何法

佛言善哉善哉如文殊所說佛言我見東方
無央數阿僧祇刹土諸佛皆悉說是舍利弗
出其所止處到文殊所見而不在便至佛所
於門外住佛謂文殊言呼舍利弗入文殊問
佛本際法身有中_有外有內當從何所得佛
言不可得答言本際以無際復言舍利弗者
亦在法身中不而所從來當所入佛語文殊
若爲苦舍利弗爲不苦譬如諸聲聞在內與
我俱語而若在外住不用時入是不爲煩答
言雖在外住亦不苦亦不煩佛問若以何故
不苦不煩文殊言佛爲聲聞說法我亦如是
故不苦不煩所以者何諸佛所離法身故文

殊言譬如恒邊沙劫不見佛亦不得入亦不
苦不煩何以故佛所說法亦無增無減所以
者何諸法無有主以是故無苦無煩諸所有
名佛因是而教人所以者何佛以是教故佛
遙問舍利弗汝悉聞文殊所語不舍利弗言
惟佛勿以自勞願樂於是往聽其法文殊自
佛可令舍利弗來入佛遙謂舍利弗前前已
作禮就坐文殊謂舍利弗於是法中何所而
尊欲入聽之聞說尊法愛樂欲聞故入欲聽
文殊言審如若所說是法實尊甚深甚深何
以故是法無有二心故所以者何非若所知
不在其中諸羅漢辟支佛亦復如是及求佛

道者何以故不可得故亦不從希望得以是
故無能在其中本清淨故諸法亦清淨舍利
弗問文殊所以羅漢不在其中文殊言婁怒
盡是爲羅漢無所住無所成當在何所中舍
利弗言故到人處不見以是故來至門但欲
聞深法故舍利弗言我從佛若從人聞其法
誠無厭極時文殊言於法無厭極如舍利弗
所語文殊問法身能有所受法不何故而無
厭極舍利弗言法身無所受其本際有所受
不舍舍利弗言無所受文殊荅舍利弗本際無
所受故而若無厭極文殊言若本際受法汝
有厭極舍利弗言除佛所說我之所語無有

與等文殊言汝能自信其法至泥洹若自信
不至泥洹舍利弗言從本以悉般泥洹文殊
言寧自信常於是不動轉舍利弗言信復問
從何所信則荅言法身無所生無所滅故知
無所動轉復問信羅漢盡無有餘無所復知
不舍利弗言信從何所信其知以無所復有
故無所知無所知者無所止故曰盡文殊言
羅漢盡故如是何以故舍利弗言悉捨諸法
無所得故文殊問汝信以恒邊沙佛般泥洹
以不般泥洹舍利弗言信從何所信法身不
生不死故不般泥洹文殊問信諸佛爲一佛
不舍利弗言信從何所信之荅曰一法身無

有二故文殊問信諸所有刹土爲一刹土不
舍利弗言信從何所信荅言所有盡故文殊
復問能信一切法無所識無所勝無所念無
有證舍利弗言信從何所信無自然而知自
然者故無所識無所脫無所念無有證亦不
生不滅亦不見亦不有見本際無處所以故
信文殊復問信法身住無所生無所滅無所
止舍利弗言信從何所信之亦不是法有所
生有所滅有所止以故信文殊問能信不可
計法身所從出能知處不舍利弗言信從何
所信荅言法身者亦無婬怒癡故信之而無
處復問舍利弗乃信諸法依佛依無所依等

不答言信之從何所信答言無所止無所止者謂不可見之所依文殊言善哉善哉舍利弗如若之境界我悉問之若皆答其所知舍利弗語文殊今我所聞者以念不復忘佛謂舍利弗若有男子女人聞是法持誦讀爲一切人廣說爲解其義疾得所欲文殊語舍利弗今佛所說無有異舍利弗白佛以供養前佛者所以後者來悉得是耶是法名曰何等當云何行名曰問法身寶積持本際持無所處所持持一切諸法無所罣礙其從若聞是者便因是法悉逮得其聞者復教詔餘人展轉相開導所以者何文少而解多佛說是

經舍利弗文殊師利菩薩諸天人卅間人民
龍鬼神一切歡喜作禮而去

佛說寶積三昧文殊師利菩薩問法身經

入法界體性經

隋天竺三藏法師闍那崛多譯

尔時婆伽婆在王舍城耆闍崛山中與大比丘衆五百人俱尔時文殊師利童子於夜初分來詣佛所到已在佛別門而立是時如來住於三昧尔時世尊從三昧起見文殊師利童子住別門外見已告言文殊師利汝來汝

來入內莫住於外。尔時文殊師利童子聞佛告已，白佛言：善哉！世尊，即詣佛所，到已頂禮佛足，却住一面。

尔時世尊告文殊師利童子：汝可就坐。時文殊師利童子言：善哉！世尊，唯然受教，向佛合掌，却坐一面。於時文殊師利童子白佛言：世尊，今者世尊任何三昧而從起耶？佛告文殊師利：有三昧，名曰寶積。然我於時行此三昧而從彼起。文殊師利復白佛言：以何因緣名此三昧為寶積耶？佛告文殊師利：譬如大摩尼寶，善磨瑩已，安置淨處，隨彼地方，出諸珍寶，不可窮盡。如是文殊師利，我住此三昧，觀

於東方見無量阿僧祇世界現在諸佛如來
阿羅呵三藐三佛陀如是南西北方四維上
下如是十方無量阿僧祇世界我皆現見是
諸如來住此三昧爲衆說法文殊師利我住
此三昧不見一法然非法界文殊師利又此
三昧名實際印若有純直男子女人行此印
者辯才不斷文殊師利言世尊我有辯才修
伽陀我知辯才佛言文殊師利汝云何知辯
才文殊師利言世尊譬如彼摩尼寶不依餘
處還依實際而住如是世尊一切諸法更無
所住唯依實際而住佛復告文殊師利汝知
實際乎文殊師利言如是世尊我知實際佛

言文殊師利何謂實際文殊師利言世尊有
我所際彼即實際所有凡夫際彼即實際若
業若果報一切諸法悉是實際世尊若如是
信者即是實信世尊若顛倒信者即是正信
若行非行彼即正行所以者何正不正者但
有言說不可得也佛言文殊師利行者是何
義文殊師利言世尊行者是見實際義佛言
文殊師利修道是何義文殊師利言世尊修
道者思惟證義佛言文殊師利汝云何爲初
行男子女人說法文殊師利言世尊我於彼
諸善男子善女人所教發我見即是爲其說
法世尊我不滅貪欲諸患而爲說法所以者

何此等諸法本性無生無滅故世尊若能滅
實際即能滅我見所生際世尊我爲初行善
男子善女人如是說法不受佛法不著凡夫
法於諸法不舉不捨世尊我爲初發意男子
女人當如是說法文殊師利言世尊亦爲教
化衆生時云何說法佛言文殊師利我不壞
色生亦不壞色不生故說法如是受想行識
亦不壞不生故說法文殊師利我不壞欲瞋
癡等而爲說法文殊師利我爲諸教化者當
令知不思議法我爲說法以如是故我成阿
耨多羅三藐三菩提文殊師利我無所壞諸
法已得成無上菩提亦無有生得成無上菩

提文殊師利所言佛者即是法界於彼諸力
無畏亦是法界文殊師利我不見法界有其
分數我於法界中不見此是凡夫法此是阿
羅漢法辟支佛法及諸佛法其法界無有勝
異亦無壞亂文殊師利譬如恒河若閻摩那
若可羅跋提河如是等大河入於大海其水
不可別異如是文殊師利如是種種名字諸
法入於法界中無有名字差別文殊師利譬
如種種諸穀聚中不可說別是法界中亦無
別名有此有彼是染是淨凡夫聖人及諸佛
法如是名字不可示現如是法界如我今說
如是法界無違逆如是信樂何以故文殊師

利其逆順界法界無二相故無來無去不可見故無其起處佛說如是法已文殊師利復白佛言世尊我亦不見法界向惡道亦不見向人天道亦不向涅槃佛復告文殊師利若有人來問汝去何現在有於六道如是問者汝去何答文殊師利言世尊如是問者我當解說世尊譬如有人睡眠作夢或見地獄道或見畜生道或見閻摩羅人或見阿脩羅身或見天處或見人等世尊彼人所見夢事諸道各各別異又人問者隨意而說然實無彼諸衆生等如是世尊我雖說諸道各別然其法界實無差別世尊如彼問者我當爲其如

實解說彼此無故世尊若行聲聞乘取涅槃者不可爲說實義世尊彼等即今現在亦不可爲其分別但說名字何以故取法界邊際故世尊譬如大海有七種寶若珂玉珊瑚金銀生色等可以相別此是其實於法界中不可知其別異之相何以故世尊法界不生不滅其法界無染無淨其法界無濁無亂其法界中無可滅者亦無生者

尔時世尊知而故問文殊師利言汝知法界耶如是世尊我知法界即是我界佛復問文殊師利汝知世間耶文殊師利言世尊如幻化人所作處是世間處世尊世間者但有名

字無實物可見說名世間行世尊然我不離
法界見於世間何以故無世間故如世尊問
言世間何處行者所謂色性不生不滅彼行
亦不生不滅如是受想行識此識性不生不
滅如是行亦無生無滅世尊如是一相所謂
無相佛復問言文殊師利汝豈不作是念若
現在如來阿羅訶三藐三佛隨當滅度耶文
殊師利荅言世尊豈可法界有已修集未修
集也法界既無修集去何得有滅不現耶佛
言文殊師利於汝意去何過去諸佛如恒伽
沙等已滅度汝豈不信耶文殊師利言世尊
我信諸如來皆已涅槃見彼出處故佛言文

殊師利於汝意云何欲使諸凡夫死已更生也文殊師利言世尊我尚不見有凡夫何有更生耶佛問文殊師利言汝於佛前樂聽法也文殊師利言世尊我亦不見樂不樂相佛言文殊師利汝豈不樂法界耶文殊師利荅言世尊我不見有一法非法界者更何所樂

佛言文殊師利若慢者聞汝說生大恐怖文殊師利言世尊若慢者生怖實際亦生恐怖其實際不恐怖故即一切諸法皆無恐怖以無修作故此是金剛句佛言文殊師利何故名此爲金剛句文殊師利言世尊諸法性不壞是故名金剛句世尊如來不思議句是諸

法不思議是金剛句佛言文殊師利何故復
名此爲金剛句文殊師利言世尊諸法無思
故是金剛句世尊諸法是菩提是金剛句佛
言文殊師利何故復名此爲金剛句文殊師
利言世尊一切法無所有但有名字言說諸
法無此無彼皆無所有此彼無所有者即是
如若是一如者則是真實若是一實者彼則是菩
提是故得名爲金剛句文殊師利言世尊一
切諸法是如來境界是金剛句佛言文殊師
利何故名此爲金剛句文殊師利言世尊諸
法自性本來寂靜故是金剛句佛告文殊師
利汝可喚阿難陀比丘來令受持此法本句

文殊師利言世尊我於中不見有一法可說
可聽世尊我實不見一字有其說處何有多
句而可持平佛言善哉善哉文殊師利汝善
說此語文殊師利我見東方無量阿僧祇世
界中諸如來阿羅訶三藐三佛陀亦說此法本
亦時長老舍利弗從自住處出往詣文殊師
利童子住處到已不見文殊師利即詣佛所
到已 在佛別門外邊而住

亦時世尊告文殊師利童子言文殊師利是
舍利弗比丘今在門外爲欲聽法汝今使入
文殊師利言世尊若彼舍利弗際若法界際
世尊此二際豈有在內在外若中間二耶佛

言不也文殊師利言世尊言實際者亦非實
際如是際非際無內無外不來不去世尊長
老舍利弗際即是實際舍利弗界即是法界
世尊然此法界無出無入不來不去其長老
舍利弗從何處來當入何所佛言文殊師利
若我在內共諸聲聞語論汝在於外而不聽
入汝意豈不生苦惱想耶文殊師利言不也
世尊何以故世尊凡所說法不離法界如來
說法即是法界法界即是如來界說法界如
法界言說界無二別無所有名者說者此等
皆不離法界世尊以是義故我不苦惱世尊
若我恒河沙劫等不來至世尊說法所我時

不生愛樂亦無憂惱何以故若有二者即生
憂惱法界無二故無惱耶

尔時世尊告長老舍利弗言舍利弗汝來入
聽文殊師利辯才耶舍利弗言唯然世尊我
甚樂聞今在室外欲聽世尊及文殊師利童
子所說尔時文殊師利白佛言世尊令長老
舍利弗得入聽法尔時世尊告長老舍利弗
言舍利弗汝來前入舍利弗言善哉世尊即
前入室頂禮佛足退坐一面

尔時文殊師利言長老舍利弗汝見何義故
而來此耶舍利弗言文殊師利我欲聽法故
來此耳此處應有最勝法義以有文殊師利

與世尊共處各有論說必有妙美當有甚深
最勝法義時文殊師利言如是如是舍利弗
我說甚深最勝法舍利弗言文殊師利此說
法以何義爲甚深最勝文殊師利言舍利弗
此法難知以無器故凡所說無所發起此所
以法不爲發起故凡夫亦不爲發起阿羅漢
法亦不爲發起如來法起發此說法以無所
依無能依故發此說法是故說法平等平等
無有任處畢竟寂靜說諸法故此無所任故
稱最勝舍利弗言文殊師利以何義故作如
是說阿羅漢漏盡非受此法器文殊師利言
長老舍利弗阿羅漢者惟盡欲瞋癡等麁惑

故彼何能作器舍利弗以是義故我作如是
言阿羅漢漏盡非此法器舍利弗言文殊師
利以斯義故我今求汝從一遊戲至一遊戲
從室至室從窟至窟我故求汝爲法樂處辯
才欲聽法故文殊師利我聽世尊及汝說法
無有厭足時文殊師利言大德舍利弗汝不
知足聽法耶舍利弗言文殊師利我不厭聽
法文殊師利言大德舍利弗豈可法界取說
法耶舍利弗言不也文殊師利言大德舍利
弗旣無厭聽法然法界共大德界無二無別
其法界不取說法若取則可知足旣不取是
故不知足舍利弗言文殊師利除諸如來何

有聽法如是也文殊師利言大德舍利弗汝
言涅槃法是舍利弗耶舍利弗言文殊師利
我有信文殊師利言汝云何信舍利弗言諸
法本性成就故我無涅槃文殊師利又問舍
利弗汝信無死法耶舍利弗言文殊師利我
有信文殊師利言汝云何信舍利弗言夫法
界者不死不生我信如是文殊師利又問大
德舍利弗汝信無智具足漏盡阿羅漢耶舍
利弗言我有信文殊師利言汝云何信舍利
弗言無智智平等故具足漏盡阿羅漢何以
故非但智離無智無智亦離無智盡法更無
智無分別故離智是漏盡阿羅漢文殊師利

問大德舍利弗言汝信漏盡阿羅漢解脫法
耶舍利弗言文殊我實有信文殊師利言汝
云何信舍利弗言彼諸法離諸法然不取諸
法我如是信文殊師利問大德舍利弗言汝
信前世諸如來阿羅訶三藐三佛隨滅度而
不得涅槃耶舍利弗言我信文殊又問汝云
何信舍利弗言文殊師利彼不思議界無生
無沒者我如是信文殊師利問大德舍利弗
言汝信諸佛是一佛耶舍利弗言我信文殊
師利言汝云何信舍利弗言文殊師利法界
不可分別我如是信文殊師利問大德舍利
弗汝信諸佛刹即是一佛刹耶舍利弗言我

有信文殊師利又問汝云何信舍利弗言文殊師利是諸佛刹依如無盡刹亦無盡我如是信文殊師利問舍利弗汝信諸法無可證無可滅無可思念不可修作耶舍利弗言文殊師利我有信文殊師利言汝云何信舍利弗言文殊師利自體不自知自體本性不捨本性自體亦不證亦無思念不相違背不生不滅不取不捨善住彼際我如是信文殊師利問言舍利弗汝信有爲界於法界中無有法生亦無有滅亦無積聚耶舍利弗言我有信文殊又問汝云何信舍利弗言文殊師利彼諸法性不可得知若生若滅若積聚住者

我如是信文殊師利言大德舍利弗汝信有
般若法界於中亦有阿羅漢名字耶舍利弗
言我有信文殊師利言汝云何信舍利弗言
文殊師利馱行般若法界是阿羅漢界然法
界體離非欲瞋癡體其阿羅漢豈能離法界
也我如是信文殊師利言大德舍利弗汝信
諸法皆是佛境界忍耶舍利弗言我實有信
文殊師利問言汝云何信舍利弗言文殊師
利世尊本性覺自性離故我如是信
尔時文殊師利言善哉善哉大德舍利弗如
汝所有境界爲我解釋我如是問汝如是答
是故我知有尔許行也

尔時世尊告長老舍利弗言舍利弗若有善
男子善女人受持此法本句若爲他解釋若
讀若誦然彼人等速得辯才舍利弗言如是
婆伽婆如是修伽陀大德世尊所說世尊然
彼衆生於前世時已曾供養諸佛世尊已爲
彼善男子善女人安立於此法印彼等衆生
當得大覺

尔時長老舍利弗白佛言世尊此法本有何
名字我等云何奉持佛告長老舍利弗言舍
利弗我此法本名文殊師利童子所問佛爲
解說如是受持亦名入法界如是受持亦名
實際如是受持舍利弗彼善男子善女人等

恭敬當如勝寶若受持此法本若讀若誦若
思惟如行當得無生法忍若為生他善根若
少讀誦已而能為他多說法義當得不斷辯
才佛說此經時文殊師利童子及餘菩薩摩
訶薩上座舍利弗及餘諸比丘并諸天眾捷
鬪婆人阿脩羅等聞佛所說皆大歡喜

入法界體性經

傷

痛癢

下音養

薜荔

上語

蒲閉

反

下

零帝

反

梵

也

羸

力垂反

教

詔

上古

老

反

訓道

之

謂也

音照

入

法界

經

字

不

出

